

靜
志
居
詩
話

靜志居詩話卷十一

秀水朱竹垞先生著

扶荔山房編輯

王廷陳字稚欽黃岡人正德丁丑進士改庶吉士
授吏科給事中諫南巡杖謫裕州知州尋下獄
免歸有夢澤集

稚欽逸藻波騰雕文霞蔚音高秋竹色豔春蘭樂府古
詩旣多精詣五言近體亦是長城固已邈後凌前足稱
才子楚眺云眺迴臨高閣三湘萬里餘草邊雲夢獵花
下武陵漁白日山川氣清秋水竹居仙蹤同霸業消歇

言方訓言 卷十一
總愁予生日有感簡同館云五十年來是行藏往日非
因之念親舊存者亦幾希弧矢心猶壯文章力已微操
觚從二子衰薄謝餘暉

江暉字景孚仁和人正德丁丑進士改庶吉士諫
南巡杖闕下出爲廣德州知州召授編修進修
撰升河南按察僉事有直爰子集

景孚穿文鑿句辭必自鑄其文有令繼闕始理訓闡詰
範詔已邛臬揆原命稽彝九篇誦之若神經怪牒蓋倣
魁紀公而作王稚欽贈以詩云江生笑兀揚文風千奇

萬怪難與窮博物豈惟精爾雅識字何止過楊雄古心
已出邱索上邃旨或與神明通求深索隱不肯置一言
忌使流俗同令弟大篆逼鐘鼎絕藝恥作斯邕等生也
爲文遣弟書一出皆稱二難竝縱有楚史不可讀滿堂
觀者徒張目少年往往致譏評生也不言但捫腹讀未
終篇覺殷仲堪之眸子裴叔則之頰毛傳寫畢露矣景
子詩稍文從字順然豈可與稚欽竝稱邪

馬汝驥字仲房綏德州人正德丁丑進士改庶吉
士諫南巡罰跪闕下五日受杖出知澤州召還

爲編修歷修撰國子司業南京右通政南京國
子祭酒升禮部右侍郎兼侍讀學士卒贈尙書
諡文簡有西玄集

仲房派沿北地由其體鈍存滓臞而舍神明雖與稚欽
齊稱去而千里

王謳字舜夫白水人正德丁丑進士除工部主事
遷刑部員外出爲按察僉事有彭衙集

舜夫詩多至千六百篇譬田甫田種豆成萁若苗有莠
當屬關中下農夜行一篇其汙萊之嘉穀乎其辭曰夜

行如在旦殘月清林光雲氣集深澗露華生早涼白沙
鬱浩浩翠壁凝蒼蒼寂歷松柏徑經過花草香雞聲互
村落曙色動柴桑卽事况多感離心含永傷

汪應軫字子宿紹興山陰人正德丁丑進士改庶
吉士諫南巡廷杖出知泗州嘉靖初召復館職
授給事中出爲江西按察僉事有青湖文集

青湖知泗州康陵南巡中使傳旨俾進美人善歌吹者
奏言泗州僻左婦女不諳歌吹惟民間醜婦能蠶儻納
之宮中受蠶事庶於治化有裨遂寢事雖迂而實可傳

也及卒鄉人私謚曰清憲先生蓋司諫爲直臣牧民爲廉吏講學爲醇儒皆第一流也其論學詩云語道豈捐陸扶世當從朱黯然思聖功二家皆真儒審擇於鵝鹿之間非偏黨陽明可知

陳良謨字中夫安吉州人正德丁丑進士除工部主事歷官貴州參政有天目山房藁

中夫生十月而孤母都夫人躬教之學旣第奉母入京邸水涸卧小舟中夜呻吟母責之曰貧生出入徒步若初入官便思安逸縱此一念吾立見汝敗矣中夫泣伏

異歷任以清介聞歸田後入峴山社年已九十賦詩云
夙駕侵寒露歸帆拂暮星興復不淺

許相卿字伯台海寧人正德丁丑進士官兵科給
事中補禮科致仕有雲村集

雲村澹於宦情居紫雲山四十年風花雪瀑游屐遍於
巖椒而不一入城市其卒也聞人嘉言輒以詩云平生
城市無雙屐何物榮衰到兩眉蓋實錄也詩取適意集
出其手刪自序謂棄其脫遺不可讀者存其餘可讀者
自題絕句云雲村病老語多詭造次詩成雜宋腔還溯

靜志居詩話

卷十一

四

扶荔山房

開元論風格拾遺壇上樹旌幢由今誦之諸體亦自清
潤不全雜以宋腔也若老如舊歷渾無用病戀殘燈亦
暫明此則宋腔之佳者霽色一律云霽色林廬晚愁吟
野水灣斷雲虹外雨殘日鳥邊山海宇堪流涕朝班祇
強顏獨嗟身世拙早見髯毛斑

楊士雲字從龍雲南太和人正德丁丑進士改庶
吉士授工科給事中歷戶科左給事中有宏山
集

給事未老抽簪自號九龍真逸坐卧小樓訂尙書蔡傳

之得失撰黑水集證自春秋以來迄於元季歷代人物
各詠以詩又取天文歷象律呂及皇極經世書地志皆
分題成詠可謂好學也已其詩原出白沙定山近取裁
於楊用修同時吳懋以給事及王廷表胡庭祿張含李
元陽唐錡爲楊門六學士六人皆滇產也

陸鉞字舉之鄞縣人正德辛巳賜進士第二授編
修出爲湖廣按察僉事轉江西督糧參議山東
提學副使有少石子集

崑山陸鼎儀鄞縣陸舉之其名同賜進士第二人同一

從史館出爲太常一從史館出爲外臺適相合也鼎儀
盛有詩名詩却平平舉之不以詩名而詩似勝於鼎儀
其督學山東也見山東舊無通志而曰周公孔子百世
之師也六經斯文之祖也泰山五岳之宗也此一方文
獻而天下古今之事備焉志奚可廢也乃編緝成書河
山十二得公數言而增色矣

張孚敬初名璉字秉用永嘉人正德辛巳進士上
疏言大禮除南京刑部主事再上疏超擢翰林
學士升禮部尚書兼文淵閣大學士歷少師兼

太子太師吏部尚書華蓋殿大學士卒贈大師
諡文忠有寶繪樓和御製詩蘿峰集

蘿峰不由史館起家特授學士又以議禮爲持名教者
所輕以是嫉詞林特甚尤惡詩人文人八才子無得免
者比諸夏嚴更覺深刻

張治字文邦茶陵人正德辛巳進士改庶吉士授
編修以左贊善使交南進學士升吏部左侍郎
掌翰林院事拜南京吏部尚書入爲禮部尚書
兼文淵閣大學士加太子太保卒贈少保諡文

隱改諡文毅萬歷初復改諡文肅有龍湖詩集

吳有洞庭山名也楚有洞庭湖名也郭景純賦云爰有包山洞庭巴陵地道潛達旁通幽岫窈窕蓋謂君山有石穴通吳之包山故包山亦以洞庭名酈善長注水經二湖俱以洞庭爲目誤也張文肅夜過洞庭詩云曉發吳閭門夕渡廣陵汜日暮江帆遲洞庭三百里微風澹無波明月照天水隱隱見君山鐘聲翠微裏是吳地也而混於楚矣善長北人未析南條諸水文肅家茶陵與洞庭湖密邇豈得以君山屬吳邪

黃佐字才伯香山人正德辛巳進士改庶吉士授
編修出爲江西按察僉事調廣西召入爲左司
諫歷侍讀諭德國子祭酒少詹事兼翰林學士
卒贈禮部右侍郎諡文裕有泰泉集

文裕撰體頗正而取材太陳故格雖聳高而氣少奔逸
然嶺表自南園五先生後風雅中墜文裕力爲起衰如
黎維敬梁公實輩皆其弟子嘉靖中南園後五先生二
子與焉蓋嶺南詩派文裕實爲領袖不可泯也春夜大
醉言志云拔劍起舞臨高臺北斗插地銀河迴長空贈

我以明月天下知心惟酒杯門前馬躍簫鼓動柵上雞啼
天地開倦游却憶少年事醉擁如花歌落梅蒙叟云
公自注云欲盡理還之喻王元美云此公作美官講學
恐人得而持之故也宮怨云上陽宮殿倚雲霞天外時
聞度翠華魚鑰重重鎖窻戶夜來春雨到梨花采蓮曲
云隔花相見兩徘徊蕩槳低頭笑不來雙棲白鷺忽驚
起遙見浮萍一道開

廖道南字鳴吾蒲圻人正德辛巳進士改庶吉士
授編修歷侍講學士謫爲徽州通判尋復職有

元素子集

鳴吾詩望之若精選體然其質鈍轄句束字易於滯澀
童承敘字士疇一字漢臣沔陽人正德辛巳進士
改庶吉士授編修進侍講歷中允司經局洗馬
國子司業左春坊左庶子有內方集

庶子與張文邦廖鳴吾號楚中三才永陵以從龍侍臣
遇之詩篇比廖差優論者擬之夏雲秋水不可方物失
其倫矣

倫以諒字彥周南海人正德辛巳進士改庶吉士

歷官南京通政司右參議有石溪集

嶺表科名之盛莫若南海倫氏自諭德文敘會試殿試俱第一其子祭酒以訓會試第一殿試第二通參以諒鄉試第一與郎中以誥皆二甲進士出身然諸公文詠皆各有集傳者特少其後人亦無繼起者昔王筠論家門謂崔氏雕龍不過父子兩三世非有七葉之中人人有集如吾門者以是知古人所重者著述科名不足較也白山以訓自號穗石以誥自號

周祚字天保紹興山陰人正德辛巳進士除來安

知縣擢給事中有定齋集

給事同懷兄弟四人皆取甲第而能不戀熱官遠師北
地游心風雅卽其不以門望驕人可以停澆激薄矣集
四卷元孫工部郎襄緒刊行之

附錄愚山云空同崛起東南士大夫多心非其學天
保自越中走使千里致書稱弟子南方之士北學於
空同越則天保吳則黃省曾也

馬敷字抑之上蔡人正德辛巳進士除兵部職方
主事改監察御史有著臺集

著臺有意法古特章句未遒

邵經邦字仲德仁和人正德辛巳進士除工部主事改刑部署員外郎建言廷杖發鎮海衛充軍
有宏藝錄

永嘉以議禮驟貴繼爲陸子餘所劾業勒歸矣尋卽召還會陽月日蝕先生上言議禮貴當用人貴公陛下私議禮之臣是不以所議者爲公禮也夫禮惟當乃可萬世不易使所議非公則禮可守也亦可變也可成也亦可毀也陛下果以禮爲至當欲子孫世守莫若厚其賚

予全其終始以答議禮之功然後轉選碩德置諸左右
使萬年之後廟號世宗不亦美乎永陵震怒旣予杖復
下獄發邊衛充軍明之列辟永陵猜忌之尤李襄愍以
漢武帝唐憲宗發策猶難免於殃死矧以人主生前臣
下輒敢預爲擬謚乎沈孝廉景倩疑世宗二字默契宸
衷遂從未減亦未必然予謂先生幸言之於嘉靖初年
爾使在西內營齋之日則斷不能保首領矣先生詩少
敦琢第七子盛行之日不沿其流派正見骨鯁處

吳檄字用宣桐城人正德辛巳進士除襄陽推官

入官戶部主事歷武選郎中出爲湖廣參議轉
山東雲南副使終陝西參政有皖山集

王道思官司封郎爲當國者所不悅謫判毘陵嘉靖乙
未三月之望朝士出餞於海淀者八人唐順之應德陳
束約之張元孝少室李遂邦良李開先伯華熊過叔仁
呂高山甫其一則用宣也海淀在阜成門外其地爲張
昌國園林昌國罹禍之後亭臺悉圯諸公置酒爲之不
樂惟用宣詩先成所云絃管不隨流水奏綺羅應化暮
雲飛者是也夏桂洲聞之遂劾元孝遂二司官無事漫

游竟下獄七人者相次罷謫惟用宣幸免爾何元朗述
顧東橋赴巖分宜飲升堂竟上座酒行嫌冷不堪既易
酒至又嫌太熱指顧揮霍不知有主人而分宜執禮愈
恭因謂使桂洲當此則東橋不免有雙江之禍矣蓋嚴
夏皆媚嫉而當時之論若似乎夏之傾陷有甚於嚴者
觀伯華海淀詩序則桂洲西市之禍朝士未始不有快
意者矣

浦瑾字文玉無錫人正德辛巳進士麗水知縣有
桂巖集

靜志居詩話

卷十一

十一

文玉晚而通籍牽絲作宰之官三日而病三月而殂故
邵國賢深惜之詩如池萍漲雨青浮岸鄰樹分陰綠過
牆林迴微風生木末江空落日上簾鉤日斜天外初微
雨雲薄樓西忽斷虹頗與國賢同調

張含字愈光永昌衛人正德丁卯中雲南鄉試有
禺山詩選

禺山雖北學於獻吉然詩不盡出其流派而一以用修
爲歸觀其襞積字句乏自運之神方之用修遠不逮也
寄升菴云公子思歸幾歲華王孫芳草徧天涯樓頭豔

曲包明月海口新鉛蔡少霞光祿塞遙空遞雁上林枝
好只棲鴉夢中記得相尋處東寺鐘殘北寺斜

附錄顧元言云愈光如蘭津天矯騰逸浮空若鴻鴈
不傳天外字芙蓉空照水中花銅柱蒹葭鴻鴈響鐵
城煙雨鷓鴣啼此例數篇非雕飾曼語 葉元禮云
禺山詩如峽中女子野花山葉翠匊銀釵非不飾姿
弄髻拭粉游紅奈時作蠻語

鄧黻字文度其先松江華亭人徙常熟中正德丁

卯舉人

文度歌鹿鳴後喪母遂不上公車以通經博古爲務嘗與客論文其大畧云文章粹於經聖賢以其精蘊而形諸辭辭可以已聖賢必無事於作作焉者不得已也三代而下放臣棄婦之辭讀之尤足以興感者性情也今之爲文者無古人之性情與其所遇之時事辭與意背以諛爲容以聚爲約浮濫而無法則可以無作或言西京之文近乎古不知壞古人之文者楊子諸人有責焉書出陸子餘歸熙甫皆是之當嘉靖中伯安道思應德旣往于鱗元美明卿伯玉本寧之派盛行詩古文交失

其真文度之論其力挽元氣者與詩亦崛奇不沿七子之習

汪本字以正歙人正德丁卯舉人有西巖集

十岳山人王寅輯新都秀蓮集以本詩壓卷稱其愁邊草木歇夢裏關山多之句蓋是時新都風氣咸以篁墩爲宗本獨以古爲師故亟取之旅邸述懷云歲月秋將晚風塵鬢欲華孤雲天外影寒菊夢中花濁酒賒難得滄洲興未涯何當返初服歸駕鹿門車

張縉字世文高郵人中正德癸酉鄉試除武昌通

判遷知光州有南湖集

南湖學詞曲於王西樓以此擅場詩其餘事如設菖蒲之菹縱有嗜者要非逸味

方邦望字表民閩縣人正德己卯舉人惠州推官有平洲集

表民與郭澄卿皆喜爲詩林文恪謂郭學杜而短於才方學孟而學不足以充之鄉曲之言不阿所好可使掌邦國之志矣

陶成字懋學寶應人正德間舉人

雲湖寫人物山水最工予嘗從喬侍讀子靜處見之歎
爲絕品凌谿其女壻也計偕入都雲湖語之曰聞張家
灣某氏丁香花盛開子盍隨我觀乎凌谿云去禮部試
僅三日公無往雲湖不許明旦凌谿他避雲湖乘篋輿
徑去醉主人家五日榜發凌谿中式比雲湖還鄉人醵
錢賀凌谿雲湖於席上畫丁香一本尤妙絕洵曠達之
士也寄朱存仁一律云別來心事不堪聞細雨孤燈獨
念君短髮漸看添亂雪此身寧得化歸雲東風楊柳題
歌扇夜雨琵琶醉舞裙幾度江干空買櫂未知何日到

淮濱存仁卽凌谿之友

文徵明初名璧以字行更字徵仲長洲人以歲貢

入京用薦授翰林待詔卒私諡貞憲先生有甫

田集

先生人品第一書畫詩次之胥臺袁氏十懷詩其一云
內翰小子師卓行古人傑辭金抗幼齡解組修晚節丹
青紛雲煙篇翰爛虹蜺瑚璉世所珍昭代表三絕可謂
片言中倫矣先生嘗語何孔目元朗云我少年學詩從
陸放翁入故格調卑弱不若諸君皆唐音也然則文之

佳惡先生得失自知豈與左虛子輩妄自夸詡者比哉
今甫田集詩十五卷集外流傳者尙多蓋先生作書最
勤兼畫必畱題予嘗見所寫朱竹卽以朱書題詩其上
惜無好事者廣搜爲續集也曩從父維木公治別業於
碧漪坊北池荷岸柳有軒三楹懸先生手書於壁卽池
上一詩云楊柳陰陰十畝塘昔人曾此詠滄浪春風依
舊吹芳杜陳迹無多半夕陽積雨經時荒渚斷跳魚一
聚晚波涼渺然詩思江湖近便欲相攜上野航少時諷
誦至今猶未遺忘因附錄之視集中所載尤出塵壒之

表拾遺珠於滄海天下之寶當與天下共之矣

蔡羽字九遠吳縣人以太學生赴選授南京翰林
孔目有林屋南館二集

杜詩韓筆百世之師也人其可自絕乎孔目於詩文高
自標許以少陵不足言所著者建安西京韓柳不足言
所撰者先秦兩漢今其集具在篇無妍辭句無警策此
猶淮南帝前自稱寡人夜郎天末不知漢大妄人也已
其自序云古之言者必有得而有所得而不言與無所得
而言均非也其言誠是矣第不知何者爲孔目所得雖

有詩賦八百餘首文二百首恒河之沙鉤金安在愚山
縱曲爲解嘲其誰信諸

湯珍字子重長洲人以歲貢生除崇德縣丞遷唐
府奉祀不赴致仕歸有小隱堂詩草

子重十試不利晚就一官其之崇德時文徵仲作澹著
色山水圖送之景甚蕭遠知其人定拔俗讀浪淘沙詞
直詣劉賓客神境非五岳九達所能及也其詞云淮河
一道達清河如此風波可奈何東岼沙崩西岼長南船
來較北船多濫瀕瞿塘險未平衡沙惡浪總堪驚相逢

盡說公無渡蜀道何曾斷客行

張靈字孟晉吳縣人

孟晉狂生游枝指生之門其畫山水足亞伯虎對酒一
詩云隱隱江城玉漏催勸君須盡掌中杯高樓明月清
歌夜知是人生第幾回可稱絕唱臨終詩云垂死尙思
元墓麓滿山寒雪一林松如聆雍門之琴頑豔亦爲淚
下

陳鐸字大聲下邳人睢寧伯文之曾孫世襲指揮

家南京有秋碧軒香月亭詩集

附錄愚山云大聲以樂府名於世所爲散套穩協流
麗被之絲竹審宮節羽不差毫末居第之南有秋碧
軒七一居精潔絕塵與勝流談讌山水仿沈啓南自
爲詩題其上人知大聲善樂府不知其能畫又不知
其工於詩也

徐霖字子仁吳人徙南京補諸生坐事削籍武宗
南狩召見欲官之固辭賜飛魚服扈從還京後
歸里有麗藻堂橐

髯仙多能藝事書畫之外工填南北曲文徵仲贈詩云

樂府新傳桃葉句彩毫徧寫薛濤箋所築快園康陵南
巡兩幸其居有晚靜閣宸幸堂浴龍池及扈蹕入都每
夜宿御榻前與帝同卧起永陵之初威武近幸多逮泊
坐罪惟子仁脫然亦滑稽之雄也

金鑾字在衡隴西人僑居南京有徙倚軒橐

白門詩家有金琮元玉金丹赤侯金大車子有金大輿
子坤金銀竹溪均著詩集諸金之中吾必以在衡爲巨
擘焉其五七言近體風情朗潤譬諸斛角靈犀近之游
塵盡辟矣至若明月照人千里共涼風吹面五更多尤

爲警策

邢參字麗文吳人有處士集

麗文狷者平生不事干謁苦志讀書除夜有海估以百
金乞墓文峻拒之抱膝擁衣飢以待旦其介如是明初
高侍郎季迪有北郭十友麗文亦有東莊十友吳燿次
明文徵明徵仲吳奕嗣業蔡羽九達錢同愛孔周陳淳
道復湯珍子重王守履約王寵履仁張靈孟晉故其詩
云昔賢重北郭吾輩重東莊胥會誠難得同盟詎敢忘
麗文遺集罕傳予從金處士侃借得手鈔本錄竹枝一

首云家住東吳白石磯門前春水浣羅衣朝來繫著木

蘭櫂閒看鴛鴦作隊

一作對

飛錢氏列朝詩神鬼門載桃

花仕女詩八絕竹枝三首在焉其二則山桃花開紅更
紅西湖荷葉綠盈盈皆麗文集中詩所云紹興上舍葛
榮夜飲圖中美人歌詩百絕侑觴乃好事者爲之不足
信也

王寵字履仁更字履吉吳縣人以諸生貢入太學

有雅宜集

履吉亦中材爾諸公惜其早亡譽之未免過實聽琵琶

云紫塞傳龍撥崑邱學鳳鳴春風吹白雪總是斷腸聲
司馬千行淚明妃萬里情當杯愁未已天末海雲生

沈翰卿字子羽江陰人儒學生有石灣集

子羽詩尙穩帖如懷施武陵作語雖末工取其立格疎
硬詩云天子觀射臨澤宮三矢中鵠欽英風鹿鳴嘉賓
慨未逢高篇重許合大雅置之建安七子中

張詩字子言本姓李宛平人有崑崙山人集

岳氏今雨瑤華以崑崙山人詩壓卷然詩實不工方棠
陵謂之曰君詩雖佳第乏情實如無山稱山無水賦水

非歡而暢不戚而哀是已是亦切中其病

鄭作字宜述歙縣人自號方山子往來梁宋間李
夢陽流寓汴中招致門下有方山子詩選

宜述游汴際空同詩名未大盛時北面稱弟子以是空
同深愛之何大復所云老鄭空同客也其詩經空同選
擇序而傳之且爲作方山精舍記又贈詩云近時好事
最者誰徽州鄭生差愛我今觀其詩頗俊利遠勝五岳
山人聞鴈云秋日江南去春風塞北歸祇愁羅網密敢
戀稻粱肥獨往寒天遠高飛舊侶稀游人夜不寐感爾

淚霑衣客中聞四弟消息云昨遇梁園使孤城舍弟居
干戈長在目烽火不通書汝計猶長缺吾心已敝廬兩
鄉千里隔相望各霑裾除夕云除夕愁難破還家夢轉
頻十年江海客孤館別離人殘漏聽還盡寒燈坐愈親
梅花滿南國誰寄一枝春

附錄王仲房云宜述家本商賈讀書苦吟爲人負氣
任俠故其詩雄渾跌宕有風骨

程誥字自邑歙人有霞城集

自邑好爲汗漫之遊山川郡邑凡所經歷必紀以詩氣

格專學空同第才情稍鈍色澤未鮮五言庶稱具體

高澂字宗呂侯官人有霞居子集

少谷居鼇峰北從之游者九人鄭鄮目爲十才子少谷
詩所云一時賢士俱傾蓋滿地萍蹤笑舉杯是也九人
者高二十二宗呂居首傳二木虛次之餘有林九王七
施二其名不得而詳矣宗呂家最貧少谷稱其事母至
孝事兄至悌又稱其甘貧守節安安然人無知者蓋高
傳爲鄮門弟子之冠少谷於傳盛誇其文於高則美其
行云

傅汝舟字木虛一名丹號丁戊山人一日磊老侯

官人有前邱生行已外篇

前邱生詩刻意學少谷子故多崛奇語句如楚樹懸猿
直衝雲帶鴈斜宿雲長抱殿游鶴不歸松野客逢迎少
山僧出入尊白爲溟海浪青盡島夷山地涇菰蒲氣風
生鸛鶴毛皆鋌鍊而出不肯猶人生弟汝楫有句云種
桃求漢核食棗想齊花頗饒韻致汝楫字木剡亦有詩
名時號二傅或是鼇峰九人之一乎

附錄徐興公云汝舟詩雖師鄭吏部而天然之趣尤

勝如雖貧一榻能高卧縱老名山恣遠尋異書自得作者意長劍不借時人看此等句吏部當爲却步矣

石麟字永也桐城人

永也白果歌載龍眠風雅未免冗長予爲芟汰存之其詞云先人卜築闢榛蕪手種白果樹兩株愛他離離祇結實曾無花謝花開日兩株樹各七分枝樹下人家亦七支聞昔蓂莢葉象十二月南海一風草一節由來草木知先幾人中之幾知者稀其曾祖英字內含正統間居郭北古塘享年一百有三生七子二十三孫有同庚

友許澹初魏谿叟年九十時棄家學道不知所之內含
百歲之日賦詩憶之云庚申共守人何在甲午同生獨
詠詩樹卽內含所植也

戚韶字龍困松江華亭人有集

龍淵遠宗楊陸近學莊陳嘗遍和谷音古詩七律頗饒
跌宕之趣孫少保毅齋合王鶴坡張一桂集題曰三詩
翁鏤板傳之三君皆珠涇鎮人也

鈕仲玉字貞父吳江人有五浮山人集

鳧溪漫橐豐存禮序之而世罕傳近其裔孫刊五浮山

人集迹其當時恒與孫太初黃勉之酬和詩亦頗類太
初非勉之可及返照一律云返照吞江色歸雲護石田
半含吳地曲不盡越山偏萬木迴元氣羣鴉接暝煙飄
然陸魯望隨意泛湖船

趙金字淮獻烏程人布衣正德中詔徵不起有浮

休集

徵士居南潯著書闌闔間入其門者有如深壑恒坐小
艇出入五湖陶然自酌南坦簪溪二尙書結峴山會造
廬請偕往不應也年六十營繭室歛平生齒牙爪髮之

已脫者洗滌而囊盛之以爲殉葬之具賦全歸詩三章
其一云憶昔耆年時嘗記齒初齟歷歷真牙生蔬食藉
以進邇來筋骨衰齒牙搖且振朝夕學種之種之惟自
慎餘齡已七十疎豁殆盡萬物有消長死生當委順
其二云十指之爪乃筋之餘搔彼白首藉爾爬梳一彈
指頃歲月其駛時或蛻之式用藏只嗟嗟此爪我心不
違他日觀化亦從而歸其三云朝梳暮梳白髮滿首一
朝禿盡真成老醜藏諸囊中括之無咎天地一毫惟我
所有人言白髮公道不負我將全歸其顏何厚又自爲

生祭文輓詩自是不復出年八十九而卒其詩不蹈時習取境故超

徐綈字紹卿吳縣人有在笥集

紹卿學詩於蔡孔目而標格矜爽所謂弟子不必不如師

附錄劉子威云蘇有兩徐生昌穀氣俊而疎紹卿思新而緩譬諸樂或舒以促或繁以殺各以一成

姜元字元仲吳江布衣有集

布衣沉思韻語具襄陽孟六之體所欠筋骨暮秋集白

陽山人五湖田舍云倚檻開湖色鉤簾見浦沙晚田惟
種秫春浦亦宜瓜落帽松風近浮觴竹日斜坐來忘出
處幽意愛陶家

馬駢字共甫江都諸生

共甫爲知泉州府事岱之子與兄駢次甫騶用甫竝有
詩名駢著紫泉集二十卷今失傳共甫撰有春秋探微
十四卷吾鄉曹侍郎有其書而揚州新舊志均未之載
也詩頗去陳言

嚴時泰餘姚人官福建鹽運司同知有牢盆集

山陰陳起侯撰浙士登科考於宏治辛酉載湖廣中式
一人嚴時泰注云辛未三甲按辛未登第者乃江夏人
晚以右副都御史巡撫四川升工部右侍郎致仕楊用
修贈詩所云昂昂嚴夫子矯矯人中龍長才抱經濟大
雅含春容叩之清廟紉朱瑟縣之東序鏗金鏞者是其
人也若餘姚嚴時泰祇官福建鹽運同知故其詩名牢
盆集集中有云憶我東南來於時歲方晏又云暮叩西
禪寺又云頗爲微官縛皆在閩中所賦然則用修贈詩
別是一人黃梨洲徵君輯姚江逸詩誤運同卽侍郎未

免爲起侯所惑矣

姚涑字維東慈谿人嘉靖癸未賜進士第一歷官

翰林院侍講學士有明山存稟

文徵仲待詔翰林相傳爲學士及楊方城所窘昌言於衆曰吾衙門非畫院乃容畫匠處此何元朗叢說述之而曰二人只會中狀元更無餘物衡山長在天地間今世豈更有道著姚涑楊維聰者邪聞者以爲快心之論然學士嘗與孫太初薛君采高子業相唱和且聞山東李中麓富於藏書特遣其子就學卽徵仲去官日躬送

至張家灣賦十詩送別比之巍巍嵩華至其贈行序畧云自唐承隋敝設科第以寵天下士爵祿予奪足以低昂其人於是天下風靡士無可稱之節者幾八百餘年然猶幸而有獨行之士時出其間以抗於世而天下之人亦罔不高之求之唐則元魯山於宋得孫明復二子豈有高第顯位爲可誇哉徒以其矯世不涅之操好古自信之志足以風勵天下而一時名流皆樂爲之稱譽焉耳今之世如二子者誠難其人吾於衡山先生竊以二子比之而衡山之所造則又有出于二子之所未純

者先生明經術以爲根本采詩賦以爲英華秉道誼以爲壇宇立風節以爲藩垣蓋嘗聞之却吏民之賻以崇孝也磨寧藩之聘以保忠也絕猗頓之游以勵廉也謝金張之饋以敦介也不懾於台鼎之議以遂其剛毅也不恩於輜裘之招以植其堅貞也此數者足以當君子之論而先生未始以爲異也聲震江表流聞于天子之庭先生亦烏得而逃哉曩者先生之貢于春官也朝廷錄其賢拔而官之翰苑儒者共指以爲榮而先生不色喜官僅三載年僅五十餘先生遽以南歸爲念吾每謬

言留之而先生持益堅三疏乞歸竟得請以去先生其
有悟於達人之指邪嗟夫先生嘗試於鄉矣有司以失
先生爲恥而先生之名益高嘗官于朝矣銓曹以不能
留先生爲恨而先生之節益重榮出於科目之外貴加
乎爵祿之上尉羅之所不能取縶維之所不能縻樊籠
之所不能收彈射之所不能驚翩然高翔如鳳皇之過
疏圃飲湍瀨回蒙汜下視泰山之鵙啄腐鼠以相嚇者
何不侔之甚也傳所謂難進而易退易祿而難畜者其
先生之徒與自大道旣漓好惡立於一鄉而不可達于

天下之廣毀譽徇於一時而不可合於萬世之公故吾之論先生直以魯山明復爲喻而使世之觀先生者不當以三吳之士求之也繹其詞傾倒爲何如者而謂學士有是言邪金華吳少君詩說謊定推何太史然則元朗乃好爲誑語者奈愚山氏信何氏之說遂不錄學士詩未免偏於聽矣

徐階字子升松江華亭人嘉靖癸未賜進士第三授翰林編修抗疏論孔子廟制斥爲廷平府推官稍遷浙江江西提學副使人爲司經局洗馬

歷升禮部尙書入直無逸殿尋入東閣辦事累
官少師吏部尙書建極殿大學士卒贈太師諡
文貞有少湖集

先祖妣徐安人爲文貞公會孫余少日登世經堂觀永
陵手勅羅列梁棟間蓋得君久而不衰罕有過焉者當
日袁懋中於西內撰青詞湛元明爲鈴山作詩序貽笑
士林而公不露所長讀少湖文集有醇無疵非諸公所
易幾矣

潘恩字子仁上海人嘉靖癸未進士累官南京工

部尙書改都察院左都御史卒贈太子少保諡

恭定有笠江集

先大母徐安人爲恭定公女孫所出予七齡時塾師課以屬對不協安人述舊事謂公六歲能調四聲因以公所訂詩韻輯畧授予自是知別四聲矣公詩凡風雅什樂府五言雜體靡不擬又與高子業田叔禾相酬和知其用力深而取友之善也

鄭曉字室甫海鹽人嘉靖癸未進士累官南京吏

部尙書尋以右都御史協理戎政改刑部尙書

卒贈太子少保諡端簡有集

端簡公家法甚嚴遺訓子孫倡優不許入門違者以不
孝論屏諸宗譜之外築別業於城東北隅穿池中央四
面種蔬藥賓客至者燕於池上百可亭亭陰有牡丹數
本嘗與夫人玩花豚一蹄魚一尾雞子四枚酒三行而
已嗣先妣孺人爲公來孫予嘗讀書其地芋魁芥孫豆
棚瓜堰恍若深村今已屬之他姓矣公銳意經史學韻
語不多作然曾刊鳴唐萬選絕句以行非不畱心風雅
也

張時徹字唯靜鄞縣人嘉靖癸未進士授兵部主
事改禮部出爲江西提學副使歷福建參政雲
南按察使山東右布政使河南左布政使以僉
都御史撫四川再撫江西遷南京刑部侍郎改
兵部進尙書有芝園集

芝園樂府不規摹古人較之濟南覺勝五律頗近初唐
七律潦倒蒼疎無譏焉已長安道云月曉開長樂風清
遶建章龍媒馳道出鳳吹彩旌揚繡陌生朱霧銅溝映
綠楊渭橋春水漲日日浴鴛鴦齋居云紫閣風雲迴彤

庭日月臨明禋昭代典肅戒小臣心雨露春偏渥星河
夜不沉長安千萬里應獻太平吟

吳鵬字萬里秀水人嘉靖癸未進士累官吏部尙
書加太子太保有飛鴻亭集

尙書居里門不自韜晦以是鄉人皆惡之會有詔許佃
浮屠廢寺爲民居公子繼輪直于官請佃楞嚴寺隙地
且酬僧徒以白金四百兩因葺野樂園蓋與勢佔者稍
有別矣園有堂曰先瀛前爲圃曰閒閒曰猗猗曰忘機
曰都春門曰吾如所堂後有樓曰雲日樓前亭二曰漱

芳曰臨賦小沼環之左右齋各一曰悟真曰守虛園成
尙書自爲作記告誡其子謂宮室勿崇土田勿闢輿馬
勿飾服御勿奢饗餼勿珍執業勿懈交游勿濫鄉鄰勿
競施予勿吝辭受勿苟觀其出言也善方諸怙寵滅義
以惡終者亦有間也尙書詩文頗條暢特少警策當在
徐沛拯民之饑截漕糧數萬發之而後請命又敗永城
賊師詔于五河瞻畧亦有過人者比於吳之陸完差可
恕爾

屠大山字國望鄞縣人嘉靖癸未進士累官兵部

左侍郎巡撫應天與倭戰失利被逮繫獄既而
釋歸有集

附錄屠長卿云公歸田後與里中故人縱飲酒酣援
筆作歌了不求工而往往神來非詞人嘔心所得

李舜臣字懋欽一字夢虞樂安人嘉靖癸未會試
第一由戶部主事改吏部歷考功員外郎出爲
江西提學僉事改南國子司業轉尙寶卿久之
召爲太僕卿有愚谷集

李獻吉有九子詩李伯華仿之亦作九子詩以懋欽爲

首次以劉子素又次羅達夫餘則呂山甫熊叔仁唐應
德趙景仁王道思潘子抑也子抑名高太原人王恭襄
瓊女壻中嘉靖壬辰進士以翰林編修建言罷官伯華
詩所云貴人懷私憤假公得一逞也又詩云潘君氣最
豪權貴等鴻毛身廢談邊務家貧賣寶刀又云有書過
千卷有田不一頃亦一負奇之士所著春谷集不傳李
伯華輯明雋僅錄其一詩而已近見晉人編仕國人文
竟不及其姓氏惜夫

陸銓字選之鄞縣人嘉靖癸未進士除刑部主事

諫大禮廷杖遷兵部員外轉禮部郎中爲張孚
敬所忌出爲福建按察副使歷廣西按察使廣
東布政使有石谿集

石谿論詩專以性情爲主嘗曰宋人不能爲唐唐人不能爲漢魏時爲之也其偶似者宋之似唐唐之似漢魏爾故諸體不沿時習五言如鳥白雲中樹山青雨後峰亂帆爭入浦羸馬怯過橋越竹成游轎吳蠶吐釣絲七言如山田雨足秋仍熟石室風高夏亦寒絕壁有松人不到深林無主鳥相忘沙頭水急潮初落山腹烟多雨

未收野樹巢空驚鶴去淺沙船動覺潮來輕便度嶺雙
肩轎小巧穿橋獨櫓舟一別動經千里闊百年消得幾
回忙皆非陳言也至若獄中次季舉之韻云聖怒不妨
爲孝子狂言豈敢託忠臣庶幾哉忠厚之遺矣

顧夢圭字武祥崑山人嘉靖癸未進士累官江西
右布政使有疣贅集

武祥清約自居有同寒素當參議粵藩賦詩云夏月行
部至雷州思製一葛且復休冬月行部至廉州思製一
裘且復休故衣雖穿尙可補秋臺擾民民亦苦胡威之

清何以過此呂仲木櫨梅花贈之曰武祥如此花矣聞者以爲美譚

高叔嗣字子業祥符人嘉靖癸未進士授工部主事改吏部歷員外郎中出爲山西參政終湖廣按察使有蘇門集

嘉靖初後生英俊稍稍厭棄李何子業以吏部郎謝病歸時獻吉畱開封辭必摹古子業自序讀書園橐謂本非所長而強力慕之度必取譏于衆其立意固殊讀其詩如食哀家梨止渴雖爽而不伐性如以水精鹽進酒

雖薄亦能醉入李中麓六十子詩子子業有云蘇門能
入室何李只升堂其傾倒也如此

韋商臣字希尹長興人嘉靖癸未進士除大理評
事疏救議禮諸臣廷杖謫靖江縣丞累遷四川
參議有南荅集

南荅世爲廉吏時以比胡威父子歸田後與蔣恭靖瑤
劉清惠麟孫僉事濟蔡同知玘唐主事樞陳參政良謨
顧尙書應祥吳太僕龍朱太守懷幹張通政寰施知州
佑李知縣丙吳副使麟參政龍一十五人結峴山逸老

清江先生詩集卷之一
之社雖僭襲不給而春秋必赴能不改其樂云父厚字
原載中成化丁未進士仕至黃州同知有翠屏詩集不
傳南苕秋社和朱雪峰韻云近圃青千疊遙山碧四圍
舟從天際至觴向雨中飛殘暑蒲葵扇新涼薜荔衣更
憐天欲霽返照弄餘暉雪峰者名雲鳳烏程人官刑部
主事蓋續入逸老社者

朱瀚字必東莆田人嘉靖癸未進士授湖廣道御
史建言廷杖放歸有天馬山房遺藁

興國太后將至禮部議出東安門入覆議由大明左門

入張璠曰雖天子必有母也焉可由旁門入乎于是從
大明中門入在永陵意中惟知有興國太后而已嘉靖
三年值慈壽皇太后誕辰有旨命婦免朝賀損巖上言
興國太后朝賀旣已舉行慈壽誕辰乃聞報罷事體相
類禮數頓殊臣切念武宗上賓蒼生無主當時爲孝廟
後者惟慈壽所欲立爾手提神器親授吾皇孝宗在天
之靈所以望陛下之事母后者何如天下臣民之心所
以望陛下之事母后者何如今乃旬月之間一舉一罷
彼此相較形迹太分何以慰孝宗在天之靈副天下臣

民之望疏入永陵震怒匪蔣文定力救不能生矣同時
疏諍者馬侍御明衡也二公可謂格君心之非者損巖
詩無俗韻誦之想見其人

狄冲字仲虛溧陽人嘉靖癸未進士歷官南京工
部郎中有春谿集

春谿歷仕不達晚乃爲郎故其詩云官銜四轉轉萬里
垂老始博尙書郎其詩清澈類楊夢山特全篇合作者
少

靜志居詩話卷十一